



## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ ՆԱԽԱԳԱՀԻ ՈՐՈՇՈՒՄ

### ՓԱՍՏԱԲԱՆ ՌՈՒԲԵՆ ՍԱՀԱԿՅԱՆԻ ՆԿԱՏՄԱՄԲ ԿԱՐԳԱՊԱՀԱԿԱՆ ՎԱՐՈՒՅԹ ՀԱՐՈՒՑԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ

Քննության առնելով զանգվածային լրատվության միջոցների (այսուհետ նաև՝ **ՋԼՄ**) հրապարակումների հիման վրա փաստաբան Ռուբեն Սահակյանի (արտոնագիր թիվ 13) նկատմամբ կարգապահական վարույթ հարուցելու հարցը,

### Պ Ա Ր Ձ Ե Ց Ի՝

#### 1. **ՋԼՄ-ների հրապարակումների համառոտ բովանդակությունը.**

14.11.2019թ. Հայաստանի Հանրապետության փաստաբանների պալատի մամուլի խոսնակ Հայկ Հակոբյանը ներկայացրել է զեկուցագիր, որի համաձայն՝ 07.11.2019 թվականին [www.youtube.com](http://www.youtube.com) կայքում հրապարակվել է տեսանյութ<sup>1</sup>, որտեղ փաստաբան Ռուբեն Սահակյանը ճեպագրույցի ընթացքում խոսելով Երևան քաղաքի ընդհանուր իրավասության դատարանի դատավոր Աննա Դանիբեկյանի մասին, արտաբերել է հետևյալ միտքը. «Նա չի փրկապետում իր մասնագիտությանը: Նախորդ նիստում չհասկացավ, թե ինչի մասին եմ խոսում և ասաց՝ «կարճ կապեք»... Եթե չես հասկանում, ինչո՞ւ կարճ կապեմ, գնա ձեր փուն, կապուներին դատապարտի: Քո կապուների գործը լսի, ոչ թե մարդկանց ... դե, նա շատ կապուներ է պահում»:

Միաժամանակ, զեկուցագրում նշվել է, որ նույն օրը Հայաստանի Հանրապետության փաստաբանների պալատը [www.1in.am](http://www.1in.am) և [www.4rd.am](http://www.4rd.am) կայքերի լրագրողներից կողմից ստացվել է բանավոր հարցում, թե արդյոք Հայաստանի Հանրապետության փաստաբանների պալատը չի պատրաստվում կարգապահական վարույթ հարուցել դատավոր Աննա Դանիբեկյանին ուղղված փաստաբանի հրապարակային արտահայտությունների հիմքով: Նշված կայքերը իրենց հրապարակումներով անդրադարձել են դատավորի հասցեին ուղղված վերը նշված խոսքին<sup>2</sup>:

<sup>1</sup> <https://www.youtube.com/watch?v=v5LiHmSWcyA&t=130s>

<sup>2</sup> <https://www.1in.am/2653818.html> ,

[http://4rd.am/news/harcy\\_chi\\_gnnarkvel\\_patabanneri\\_palat/2019-11-07-601?fbclid=IwAR1q\\_dGFEimeDHG1DSZCZYICsap50m1BJ-yG99yE5AFwj2ymoz4goG6kJzw](http://4rd.am/news/harcy_chi_gnnarkvel_patabanneri_palat/2019-11-07-601?fbclid=IwAR1q_dGFEimeDHG1DSZCZYICsap50m1BJ-yG99yE5AFwj2ymoz4goG6kJzw)

## **2. Պալատի եզրահանգումը և որոշումը.**

**Գտնում են, որ զանգվածային լրատվության միջոցների հրապարակումների հիման վրա փաստաբան Ռուբեն Սահակյանի նկատմամբ պետք է հարուցել կարգապահական վարույթ՝ հետևյալ պատճառաբանությամբ.**

«Փաստաբանության մասին» Հայաստանի Հանրապետության օրենքի (այսուհետ, նաև՝ Օրենք) 19-րդ հոդվածի 2-րդ կետի համաձայն՝ **փաստաբանը պարտավոր է պահպանել սույն օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:**

Օրենքի 39-րդ հոդվածի 1-ին մասի համաձայն՝ փաստաբանը ենթակա է կարգապահական պատասխանատվության սույն օրենքի և փաստաբանի վարքագծի կանոնագրքի պահանջները խախտելու համար:

Օրենքի 39.<sup>1</sup> հոդվածի 2-րդ մասի 1-ին կետի համաձայն՝ **փաստաբանի նկատմամբ կարգապահական վարույթ հարուցելու առիթներն են՝** պետական, տեղական ինքնակառավարման և ոչ պետական մարմինների, ինչպես նաև այլ անձանց դիմումները (բողոքները), ինչպես նաև **զանգվածային լրատվամիջոցների հրապարակումները:**

Նույն հոդվածի 4-րդ մասի համաձայն՝ կարգապահական վարույթ հարուցելու հիմքն է փաստաբանի արարքի մեջ սույն օրենքի կամ փաստաբանի վարքագծի կանոնագրքով նախատեսված պահանջների խախտման հարկանիշների առերևույթ առկայությունը:

ԶԼՄ-ների հրապարակումների ուսումնասիրության արդյունքում Պալատը գալիս է այն եզրահանգման, որ դրանում տեղ գտած որոշակի փաստերի հաստատման դեպքում փաստաբան Ռուբեն Սահակյանի արարքում կարող է առերևույթ առկա լինել Օրենքի 19-րդ հոդվածի 2-րդ կետի, ինչպես նաև Պալատի ընդհանուր ժողովի կողմից 19.10.2019 թվականի թիվ 1-Լ որոշմամբ նոր խմբագրությամբ հաստատված Փաստաբանի վարքագծի կանոնագրքի (այսուհետ՝ **Կանոնագիրք**) 2.2.2 ենթակետի խախտման հատկանիշներ:

Կանոնագրքի 2.2.2 ենթակետի համաձայն՝ **Մասնագիտական, հասարակական, հրապարակախոսական կամ այլ բնագավառում (ոլորտում) փաստաբանը պետք է խուսափի այնպիսի վարքագծից (գործողությունից կամ անգործությունից), որը կարող է կասկածի տակ դնել կամ խաթարել փաստաբանի կամ փաստաբանության նկատմամբ վստահությունը կամ հարգանքը:**

Իրավունքի գերակայության հանդեպ ունեցած հարգանքի վրա հիմնված հասարակության մեջ **փաստաբանը հարուկ դեր է ստանձնում** և նրա պարտականությունները չեն սկսվում և ավարտվում միայն վստահորդների հանձնարարականների բարեխիղճ կատարմամբ:

Փաստաբանը՝ որպես արդարադատության շահերին ծառայելու կոչումը կրող անձ, պարտավոր է իր գործողություններով նպաստել փաստաբանի մասնագիտական գործունեության հանդեպ հարգանքի ձևավորմանը:

Տվյալ դեպքում, ԶԼՄ-ների հրապարակումների ուսումնասիրությունից

առերևույթ հետևում է, որ Ռուբեն Սահակյանը լրագրողների հետ ճեպագրույցի ընթացքում խոսելով Երևան քաղաքի ընդհանուր իրավասության դատարանի դատավոր Աննա Դանիբեկյանի մասին, արտաբերել է հետևյալ միտքը. «Նա չի փորապետում իր մասնագիտությանը: Նախորդ նիստում չհասկացավ, թե ինչի մասին եմ խոսում և ասաց՝ «կարճ կապեք»... Եթե չես հասկանում, ինչո՞ւ կարճ կապեմ, գնա ձեր փուն, կապուներին դատապարտի: Քո կապուների գործը լսի, ոչ թե մարդկանց ... դե, նա շատ կապուներ է պահում»:

Եվրոպական դատավորների խորհրդատվական խորհրդի թիվ 16 (2013) կարծիքի 25-րդ կետի համաձայն՝ ... Պրոֆեսիոնալ գործընկերների նկատմամբ հարգանքի, օրենքի գերակայության և արդարադատության արդար իրականացման հարգանքի՝ Փաստաբանների և իրավաբանների միությունների եվրոպական խորհրդի «Եվրոպայում իրավաբանի մասնագիտության հիմնարար սկզբունքների մասին» խարտիայում սահմանված սկզբունքներով պահանջվում է խուսափել գործընկերների, առանձին դատավորների և դատարանի ընթացակարգերի ու որոշումների վիրավորական քննադատությունից:

**Այս տեսակետից ԶԼՄ-ների հրապարակումներում նշված փաստերը հաստատվելու, և փաստաբան Ռուբեն Սահակյանի կողմից կատարված արտահայտությունները վիրավորական համարելու դեպքում փաստաբան Ռուբեն Սահակյանի վարքագիծն առերևույթ կարող է հակասել «Փաստաբանության մասին» ՀՀ օրենքի 19-րդ հոդվածի 2-րդ կետի, ինչպես նաև Կանոնագրքի 2.2.2 ենթակետով նախատեսված կանոններին:**

\* \* \*

**Սույն որոշմամբ կարգապահական վարույթը հարուցվում է՝** փաստաբան Ռուբեն Սահակյանի կողմից դատավոր Աննա Դանիբեկյանի հասցեին առերևույթ զսպվածությունը և բարեկրթությունը սահմանազանցող արտահայտություններով փաստաբանի կամ փաստաբանության նկատմամբ վստահությունը կամ հարգանքը խաթարելու վարքագիծը ստուգելու նպատակով:

**Միաժամանակ Պալատը հարկ է համարում արձանագրել, որ փաստաբանի նկատմամբ կարգապահական վարույթ հարուցելն ինքնին չի նշանակում, որ փաստաբանը թույլ է տվել կարգապահական խախտում և այդ հարցի վերջնական պատասխանը կարող է տրվել միայն կարգապահական վարույթի իրականացման արդյունքում Պալատի խորհրդի համապատասխան որոշմամբ:**

Ելնելով վերոգրյալից,

ղեկավարվելով «Փաստաբանության մասին» օրենքի 39-րդ հոդվածի, 39.1 հոդվածի 2-րդ մասի 1-ին կետի, 4-րդ մասի, 39.3 հոդվածի, ինչպես նաև Պալատի ընդհանուր ժողովի կողմից 19.10.2019 թվականի թիվ 1-Լ որոշմամբ նոր խմբագրությամբ հաստատված Փաստաբանի վարքագծի

կանոնագրքի հավելվածը հանդիսացող «Փաստաբանի նկատմամբ կարգապահական վարույթի իրականացման» կարգի 2-րդ գլխի պահանջներով, ինչպես նաև «Հայաստանի Հանրապետության փաստաբանների պալատի նախագահի առաջին տեղակալին կարգապահական վարույթ հարուցելու լիազորություն վերապահելու մասին» Պալատի նախագահի 21.11.2019թ. թիվ 479-Ա որոշմամբ,

### **Ո Ր Ո Շ Ե Ց Ի՝**

**1. Չանգվածային լրացվության միջոցների հրապարակումների հիման վրա փաստաբան Ռուբեն Սահակյանի (արտոնագիր՝ թիվ 13) նկատմամբ հարուցել կարգապահական վարույթ՝ «Փաստաբանության մասին» ՀՀ օրենքի 19-րդ հոդվածի 2-րդ կետի, ինչպես նաև Կանոնագրքի 2.2.2 ենթակետի խախտման հարկանիշներով (կարգապահական գործ թիվ՝ ԿԳ-19239):**

**2. Հանձնարարել Պալատի աշխատակազմի ղեկավարին՝**

**– կարգապահական գործը սահմանված կարգով հանձնել հերթական կարգապահական գործ նախապարաստողին.**

**– սույն որոշման օրինակն ուղարկել փաստաբան Ռուբեն Սահակյանին՝ պարզաբանելով «Փաստաբանության մասին» օրենքի 39.<sup>2</sup> հոդվածով նախատեսված իրավունքները.**

**– սույն որոշումը հրապարակել Պալատի կայքում:**

Հայաստանի Հանրապետության  
փաստաբանի պալատի  
նախագահի առաջին տեղակալ՝

Էմիլ Ամիրխանյան

21 նոյեմբերի 2019թ.  
թիվ 480-Ա/ԿԳ-19239  
ք. Երևան